

**Ulluunerani paaqqinnittarfiit pilersinneqartarnerat atoruminarsagaanerallu taamatullu suleqatigiinnik pilersitsisarneq pillugit Namminersorlutik Oqartussat nalunaarutaat nr. 36, 24. september 2020-meersoq**

Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisaat nr. 16, 3. december 2012-imeersumi § 6, imm. 3 aamma § 12, imm. 3 naapertorlugit aalajangersarneqarpoq:

**Kapitali 1**

*Ulluunerani paaqqinnittarfinnik pilersitsineq atoruminarsaanerlu*

*Ulluunerani paaqqinnittarfinnik pilersitsinermut pisatsernermullu nalinginnaasumik aalajangersakkat*

§ 1. Ulluunerani paaqqinnittarfiit perorsaanermut, inooqatigiinnermut paarsinermullu tunngatillugu siunertat aallaavigalugit pilersinneqassapput atoruminarsarneqarlutillu aamma timikkut, eqqarsartaatsikkut najoruminassutsikkullu meeqqat avatangiisaasa, meeqqap ingerlalluarnernanut, peqqissusianut, ineriartorneranut ilikkariartorneranullu siuarsaataasut, pilersinneqarnissaat siunertaralugu.

*Imm. 2.* Ulluunerani paaqqinnittarfiup atortulersuutitigut meeqqat misigisaqarsinnaanerisa, pinnguarsinnaanerisa, itisilerisinnaanerisa, misigisassarsiorsinnaanerisa suliaqarsinnaanerisalu, meeqqat takorluuisinnaanerannut isumassarsiorsinnaanerannullu kajumilersitseqataasut, qulakkeerneqarnissaat siunertaralugu tulluarsarneqassapput aamma meeqqat inooqataanerminnik nalinginnaasumillu piginnaasaqarnerminnik annertusaasinnaanerannut timikkullu piumassuseqarlutik ineriartorsinnaanerannut tapersersuutaallutik.

*Imm. 3.* Ulluunerani paaqqinnittarfiit, taamatuttaaq pinnguarterfitta, atortussianik peqqissutsimut ajoqusiisinaasutut ilisimaneqartunik atuilluni pilersinneqassanngillat.

*Imm. 4.* Ulluunerani paaqqinnittarfiup atortulersuutai imatut ilusilersorneqarsimassapput meeqqat ukiuinut ineriartornerannullu tunngatillugu ataasiakkaat eqqaamaneqarlutik, takuuk Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisaanni § 11.

*Imm. 5.* Sananeqaatitigut atortulersuutit atorsinnaassusiannik naliliinermi pingaartinneqassaaq init meeqqat isersimaffigisartagaat, eqqiluisaarnikkut pissutsit silamilu pinnguarnermut periarfissat atortulersuutillu isumannaatsuussammata taamatuttaaq peqqissutsimut tunngatillugu siunertamullu naleqquttuunissaannut tunngatillugu.

§ 2. Ulloq unnuarlu paaqqinniffik qaqugukkulluunniit sanaartornermut qatserisartoqarfimmit oqartussaasunit Sullivinnillu Nakkutilliisoqarfimmit akuerineqarsinnaasumik ilusilersorneqarsimassaaq.

*Ulluunerani paaqqinnittarfinnik inissiisarneq*

§ 3. Ulluunerani paaqqinnittarfiit nunami meeqqat ulorianartorsioratik sammisaqarnissaannut akornuteqaratillu pinnguarnissaannut periarfissalimmi inissinneqartassapput.

*Imm. 2.* Ulluunerani paaqqinnittarfiit suliffeqarfiit nipiliortut, pujoralatsitsisut silaannarmilluunniit mingutsitsisut imaluunniit innaallagissap aqqutaanik qulimiulinni inissinneqartassanngillat.

*Imm. 3.* Ulluunerani paaqqinnittarfinnik inissiinermi sanilerisaat mianerineqartassapput, taamaalillutik taakku ulluunerani paaqqinnittarfinni pinnguarterfimmilu pisartunik pisariaqanngitsumik akornusersorneqartassanngimmata.

*Ulloq unnuarlu paaqqinnittarfiit tulluarsagaaneri pillugit aalajangersakkat*

§ 4. Ulluunerani paaqqinnittarfinnik tulluarsaanermut atatillugu piumasaaqatit uku naammassineqarsimassapput:

- 1) Ulluunerani paaqqinnittarfiup tamakkerluni angissusia minnerpaamik ulluunerani paaqqinnittarfinni inissamut ataatsimut 6 kvadratmeteriussaaq.
- 2) Susassaqartitsiviit tassaasut ulluunerani paaqqinnittarfiup ataatsimoortukkaanut initaasa, ataatsimoortarfiata aamma suliaqartitsinermut sammisassaqartitsinermullu initaasa angissusiat minnerpaamik ulluunerani paaqqinnittarfinni inissamut ataatsimut 4 kvadratmeteriussaaq.
- 3) Angissusiata ilaa tassaasoq ataatsimoortarfinni naqqup atorneqarsinnaasup angissusia meeqqanut pingasunik ukioqalereersimasunut minnerpaamik ulluunerani paaqqinnittarfinni inissamut ataatsimut 2 kvadratmeteriussaaq meeqqanullu pingasunik ukioqalersimanngitsunut 3 kvadratmeteriussalluni.
- 4) Ulluunerani paaqqinnittarfiup igaffia minnerpaamik 12 kvadratmeteriussaaq igaffimmilu nerriviit akileriit imminnut ungasissusiat minnerpaamik 1,8 meteriussalluni.
- 5) Pingaarnertut isertarfia paarleqassaaq angajoqqaat kamippaasa meeqqanik tunniussinermut aallernermullu atatillugu inissinneqarfigisinnaasaannik.
- 6) Torsuusat minnerpaamik 1,6 meterinik silissuseqassapput.
- 7) Matut minnerpaamik 0,9 meterinik atitutigissapput ajornanngitsumik appakaaffigineqarsinnaanerat 0,77 meterinik silissuseqarluni.
- 8) Inini igalaaqanngitsuni matut matuersaatinik atuinngikkaluarluni ammarneqarsinnaassapput.
- 9) Tummeqqat portoqatigiinngiiaartunik tummerartaqassanngillat.
- 10) Tummeqqat sinaakkutaasa tigummiviat nalinginnaasumik aalajangersimaneranut ilanngullugu meeqqat 0,6 meterinik angissusianni tigummivittaqaassaaq.

- 11) Tummeqqat majuartarfinni atertarfinnilu tummeqqanut ungaluusani isumannaallisaatitaqassapput.
- 12) Aneerasaartarfiit ungalui 1,2 meterinik minnerpaamik portussuseqassapput, taamaalilluni meeqqat qallorsinnaassanngimmata imaluunniit tummeqqat napasuisa akornisigut anillassinnaassanngimmata. Tummeqqap napasuisa imminnut ungasissusiat 89 mm. qaangissanngilaa.
- 13) Igalaaraqarfiit igalaallu natermiit 0,6 meterinik qaffasissusilerlugit inissinneqassapput.
- 14) Nangilersuisarfiit tamarmik igalaaqassapput.
- 15) Anartarfiit initaat ataatsimoortarfinniit sammisassaqtitsivinniillu toqqaannartumik iserfigineqarsinnaassanngillat.
- 16) Ulluunerani paaqqinnittarfik naleqqussarneqassaaq inunnut innarluutilinnut immikkut iliuuseqaaqaanngikkaluarluni tiguisinnaanngorlugu.
- 17) Illup silataani iseriartortarfiup portoqataani matunut isertarfinnut illullu initaani allerni immikkoortartaqarfinnut peqarsimappallu elevatorinut isersinnaasoqassaaq.
- 18) Ulluunerani paaqqinnittarfik imatut naleqqussarneqarsimassaaq meeqqap timaanik passussinissamut periaatsit meeqqap namminiussutsiminik pisariaqartitsineranut, aamma sapinngisaq tamakkerlugu isumannaatsuunissamut toqqissisimanissamullu naapertuuttunngorlugu, taamatuttaaq ulluunerani paaqqinnittarfinni kinguaassiuutitigut innarliisinnaanernut pinngitsaaliisinnaanernulluunniit tunngatillugu.

§ 5. Piumasaqaatit § 4-mi taaneqartut saniatigut ulluunerani paaqqinnittarfinni pigineqassapput:

- 1) Meeqqat atisaajartarfiat meeqqanut ataasiakkaanut tamanut immikkut atisanut inissiivissartalik.
- 2) Atisaajartarfiup qanittuani atisanik panersiisinnaanermut periarfissaq.
- 3) Ulluunerani paaqqinnittarfinni inissanut 40-nut minnerpaamik innarluutilinnut anartarfik ataaseq.
- 4) Ulluunerani paaqqinnittarfinni inissanut qulinut minnerpaamik meeqqat anartarfiat ataaseq iluaniit mapperuminartunik matulik, tak. § 6, imm. 1.
- 5) Init qasuersertarfiit kiassakkat imaluunniit oqorsaasersukkat minnerpaamik 12 kvadratmeterinik angissusillit qasuersarfissallit ulluunerani paaqqinnittarfinni meeqqanik arfinilinnik ukioqalersimannigitsunik tiguisartuni paaqqinnittarfiup akuerisaasumik inissaqartitaasa pingajorarterutaannik amerlassusillit.
- 6) Minnerpaamik ini errorsisarfik ataaseq errorsissutalik panersiivilillu parnaarneqarsinnaasoq.
- 7) Kuutsitsiffiusinnaasoq bruserimik anartarfinni qanittuaniluunniit.
- 8) Toqqorsivik meeqqanut ineqatigiiaanut tamanut 3 kvadratmeterit missaannik angissusilik.
- 9) Nangilersuisarfik ineqatigiinnut asattarfilik, ulluunerani paaqqinnittarfinni meeqqanik pingasunik ukioqalersimannigitsunik tiguisartunik, tak. § 6, imm. 24.
- 10) Anartarfiit ineerartaat immikkoortut matullit ulluunerani paaqqinnittarfinni meeqqanik arfinilinnik ukioqalereersimasunik tiguisartuni.
- 11) Nerisassaasivik minnerpaamik ineqatigiinnut 2 kvadratmeterinik angissusilik.
- 12) Eqqiaanermut atortunut eqqiaanermullu atortulersuutinut toqqorsivik parnaarneqarsinnaasoq.
- 13) Nillartaatitsivinnut qerititsivinnullu inissiivik.
- 14) Aneerussivinnut, cyklinut qamutinullu inissiivik.
- 15) Allaffinnut sulisunullu atortulersuutit.
- 16) Pinnguartarfeqartitsineq, tak. § 7, imm. 3, minnerpaamik ulluunerani paaqqinnittarfinni inissamut

10 kvadratmeteri.

17) Pinngussat ukioqatigiiaanun pineqartunut akuerisaasut.

§ 6. Meeraaqqeriviit tulluarsarneqassapput mikisunik anartarfilerlugit asattarfiit asannermulluunniit kuugaartitsiviit pukkitsumut inissillugit. Meeqqeriviit aamma assigiinngitsunik ukiulinnut ulluunerani paaqqinnittarfiit meeraqatigiinnut inersimasunut angissusilimmik minnerpaamik ataatsimik anartarfilerlugit tulluarsarneqassapput.

*Imm. 2.* Meeraaqqanik passussisarfiit meeqqat pinnguarterfiinit nerisarfiinillu immikkoortinneqarsimassapput naammattumillu periarfissalerlugit tulluarsarneqassallutik tassa suulluunniit pisariaqartinneqartut tigorianaannorlugit. Meeraaqqanik passussisarfiit portussusiat naleqqussarneqarsinnaassaaq meeqqat qullartittaataanut appartittaataanulluunniit annqussinnaatinnagit, tak. § 12, imm. 2.

*Illup silataaniittut pillugit immikkut*

§ 7. Ulluunerani paaqqinnittarfiup silataa illuaqqamik silami pinnguarnermut atortut inissisimavissaannik atortulerneqarsimassaaq.

*Imm. 2.* Illup silataa naatsiiviliinissamut imaluunniit aalisakkanik nivinngaaterinissamut periarfissalerlugu tulluarsarsimassaaq.

*Imm. 3.* Illup silataa pinnguafissalerlugu iluarsineqarsimassaaq,

- 1) pinngortitap eqqaaniittup ilaatut iluarsartuullugu,
- 2) imatut angitigisunngorlugu meeraqatigiiaat tamarmik ataatsikkut tassaniissinnaanngorlugit
- 3) isumannaatsumik ungaluugalersimassalluni,
- 4) atortulersugaassalluni meeqqat amerlasuut ataatsikkut pinnguaqatigiissinnaanngorlugit aamma
- 5) atortulersugaassalluni meeqqat nukersorsinnaassusiannut unammillernartunik.

*Imm. 4.* Ungalup napasuisa pinnguafissamiittullu imminnut ungasissusiat 89 mm. qaangissanngilaa.

*Illup iluani avatangiisit pillugit immikkut*

§ 8. Sammisassaqtitsiviit, tak. § 4, imm. 1, nr. 2, portoqatigiittumiissapput quasattoornanngitsunillu natilerlugit tulluarsarneqarsimassallutik.

§ 9. Meeraqatigiiaanun tamanut inimik qasuersertarfeqassaaq, meeqqat qasuerserfigisinnaasaat. Ini qasuerserfittut atorineqanngikkaangat meeraqatigiit sammisassaqtinnerinut annikinnerusunut atorineqarsinnaassaaq, inissisimavittulli soorlu aneerussivinnut atorineqassanngilaq.

*Imm. 2.* Meeraqatigiit inaat tamarmik asattarfilerlugit atisaajartarfilerlugillu

tulluarsarneqarsimassapput minnerpaamik meeqqamut ataatsimut ilisivittalerlugit.

**§ 10.** Ini sammisassaqartitsivik meeraqatigiinnut tamanut ataatsimoorussaassaaq tulluarsarneqarsimassallunilu timigissarnermut nukersornermullu atorneqartarnissaa siunertaralugu.

*Imm. 2.* Inimut sammisassaqartitsivimmut atasumik atortunik inissiisarnermut inimik toorsiveqartitsisoqassaaq.

*Imm. 3.* Ini sammisassaqartitsivik illup qeqqanut inissinneqassanngilaq pisariaqanngitsumik aqputigineqartarnissaata pinngitsoortinneqarnissaa siunertaralugu.

**§ 11.** Ulluunerani paaqqinnittarfiup initai nipikillisaatitalerlugit tulluarsarneqarsimassapput ukuninnga atortoqarluni

- 1) qilaat nipikillisaatillit,
- 2) naqqit tummaarpalutsitsinngitsut,
- 3) iikkat nipikillisaatillit, aamma
- 4) issiaviit nipikillisaatillit, tiitorfiit aamma puuguttat.

*Imm. 2.* Illu iluani qaammaqqutit inimi qasuersertarfirmi sakkukillisinneqarsinnaassapput inillu seqinermut alanngiffiligaassapput sakkortunngitsunillu qalipaatilinnik qalipanneqarsimallutik.

**§ 12.** Ulluunerani paaqqinnittarfik pequtilersorlugu tulluarsarneqarsimassaaq taamatullu nerriveqarluni, issiaveqarluni meeraaqqanillu passussisarfeqarluni atuisunut naleqqussarnissaat siunertaralugu naleqqussarneqarsinnaasunik.

*Imm. 2.* Nerriviit portulineqarsinnaasut pukkilineqarsinnaasullu atortorissaarutunik isumannaallisaatitaqassapput meeqqat attorsinnaanngisaannik.

*Imm. 3.* Pequtit eqqiaruminartunik ilusilersorlugit sananeqarsimassapput atortorineqartullu asanneqarsinnaassallutik imaluunniit ulluinnarni qaavi pujoralaajarneqarsinnaassallutik.

## **Kapitali 2**

### *Suleqatigiinnik pilersitsisarneq*

**§ 13.** Kommunalbestyrelsi suleqatigiit meeqqanut ataasiakkaanut sammitinneqartut akornanni ataqatigiissaakkamik suleqatigiinnissaat qulakkeerniarlugu pisariaqartitsisoqartillugu suleqatigiinnik pilersitsisassapput.

*Imm. 2.* Suleqatigiit inuttarissavaat pisortat ingerlatsivii assigiinngitsut ataasiakkaat akimorlugit meeqqanik ataasiakkaanik sulinermt toqqaannartumik peqataasut. Taakkuusinnaapput sulianik suliarinnittartut, inuit tapersersortaajunnartut, meeqqerisut, peqqissaasut, nakorsat, kigutit nakorsaat, kigutigissaasut, tarnip pissusaanik ilinniarsimasut, pillorissaasut aamma timimik sungiusaasut,

inuussutissalerinnermi ilinniarsimasut, meeqqamut ilinniartitsisunngortussat, perorsaasut, inunnik isumagininnermi siunnersortit aamma inuit sulianik aalajangersimasunik suliallit, suliamut tunngatillugu ilisimasaqarnerat pisariaqartinneqassappat meeqqap pisariaqartinneqartut tapersorneqarnissaa eqqarsaatigalugu.

**§ 14.** Kommunalbestyrelsip suleqatigiinnik pilersitsisoqartariaqarneranik nalilersuinnermini pingaartissavaa meeraq

- 1) angerlarsimaffimmini toqqissisimannginnersoq,
- 2) angerlarsimaffimmini inuuniarnikkut ajornartorsiuteqarnersoq imaluunniit
- 3) immikkut ilisimasalinnik ikiorneqarnissaminik immikkut pisariaqartitsinersoq assersuutigalugu atuarniarnermini allanniarnerminilu ajornartorsiuteqarnermi, ADHD-p, timikkut innarluuteqarnermi imaluunniit sumiginnagaanermi kingunerisaannik.

**§ 15.** Suleqatigiit meeqqap pisariaqartitaasa sulissutigineqartarnissaat malillugu naapeqatigiittassapput.

*Imm. 2.* Suleqatigiit meeqqap tapersorneqarnissamik pisariaqartitsinerata paasineqarneraniit meeqqap immikkut tapersorneqarnissamik pisariaqartitsinerata pisariaarunnissaata tungaanut ingerlasassapput.

*Imm. 3.* Suleqatigiit susassaqarfiit akimorlugit suleqatigiinnerminnut atatillugu attaveqatigiittut naapeqatigiittassapput, tamatumaniilu meeqqap angajoqqaatut oqartussaasui imaluunniit pilersuisuusut peqataatillugit, meeqqanut ataasiakkaanut siusissukku iliuuseqarnissaq siunertaralugu.

### **Kapitali 3**

#### *Atuutilerfia*

**§ 16.** Nalunaarut manna atuutilerpoq ulloq 1. oktober 2020.

*Namminersorlutik Oqartussat, ulloq 24. september 2020*

Karl Frederik Danielsen

/

Karsten Peter Jensen